



Fédération de Gouren

Bodadeg ar Gouren

Landernev, d'ar 26 a viz Du 2009

Sant-Ernel, 29800 LANDERNEV

Pg & fax : 02 98 85 40 48

federation@gouren.com

www.gouren.com

KEMENNADENN

Bodadeg ar Gouren, enni 1 500 a dud lisañsiet ha 5 000 a vugale ha krennarded well-wazh o pleustriñ er skolioù a vloaz da vloaz, liammet ouzh an deskadurezh Stad evit ober war-dro amproenn gouren ar vachelouriezh, zo bet klasket abeg outi gant an Association Stéphane Lamart abalamour ma vez kinniget “ul loen bev da lod pe briz” ganti.

Barnet e vo an afer e lez-varn Brest adalek 9 eur d'al lun 14 a viz Kerzu.

Ar maout eo al loen a ginnigomp d'ar gourener a zo bet trec'h en hor brasañ tournamantoù-hañv (pemp pe c'hwec'h ar bloaz). Ur c'hiz kozh eo, biskoazh dilezet, anavezet-mat en istor ar vro.

Arouez ar c'hourenerien eo ar Maout ouzhpenn-se, gwriet ouzh o roched-gouren. En hor yezh eo deuet ar maout da vezañ arouez an trec'hioù reizh ivez, dre vras.

Rak ul le a vez distaget gant hor gourenerien a-raok pep tournamant, evit diskouez o lealded ha lakaat berzh war bep treitourezh ha war bep taol feuls. Penaos e c'hallfe an trec'her neuze bezañ rust ouzh ar maout en deus gounezet er mod-se ? Sammañ 'ra anezhañ war e zivskoaz, dishual ha diere, da ober un dro-lis gantañ.

D'hor meno ne yeomp ket a-enep da destenn al lezenn (ne reomp lotiri ebet ha ne rannomp ket prizioù etre an dud), na kennebeud-all a-enep da spered al lezenn (ne vez ket gwallgaset al loen). Anv zo ganimp eus un hengoun start, a-bell-zo, stag ouzh hor glad sevenadurel.

Sed aze petra zo kaoz ma c'houlennomp sikour ha kenskoazell digant an holl geodidi a zo tomm o c'halonoù ouzh sevenadurezh Breizh hag ouzh al loened ken-ha-ken.

Trugarekaat a reomp diwar-vremañ kement hini a ziskouezo harpañ ac'hanomp en ur mod eeun ha sioul ha, hervez hol le, “gant lealded, hep trubarderezh na taol fall ebet”.

Erwan Evenou,
Prezidant Bodadeg ar Gouren